

KINA CHA FIKIRA



**KAULI YA
WALIBORA**

"Ilikuwa furaha iliyoje kutangamana na nguli huyu wa fani ya ubunifu na taaluma ambaye aliegemea sana katika falsafa"

Tarehe 9 Januari 2020 ndiyo siku aliyotua mko mwandishi nguli Euphrase Kezilahabi, tukio ambalo limeuacha ulimwengu wa Kiswahili katika jitimai kubwa. Kwa sababu tayari nimehojiwa kumhusu kwenye vyombo kama vile Taifa leo, BBC and Radio Maisha, ni rahisi kuhisi kwamba hapana tena la kusema kumhusu mwandishi huyu maarufu. Ila bado ninao mshawasha kusema mengine zaidi. Wanaosema husema hakuna ziada mbaya. Tena yamkini baadhi ya wasomaji wangu hawakuwahi kusikia kauli zangu fupi kuhusu mwandishi mwenzangu katika vyombo hivi ya habari.


Mimi mwanzo nimekutana na Prof Kezilahabi katika vitabu vyake. Nimekisoma mwanzoni kabisa nikiwa kida to cha kwanza kitabu chake cha awali *Rosta Mistika* kilichozua kasheshe. Nilivutiwa na ujumi wa usahihi wa kazi hiyo, alama ya utambulisho wa kazi zake zote. Kitabu chenye msuko sahili na lugha sahili kwa jicho la kizembe.

Ila ukichanganua vizuri unakumbana na vito na lulu tele zilizofichama humo. Kwa kweli baadaye niliposoma vitabu vyake vingine kama vile *Dunia Uwanja wa Fujo, Kichwamaji, Kapula la Karl Marx, na Karibu Ndani* niligundua ugumu uliofichama ndani ya kile kinachoonekana kama usahihi wa mtindo wake.

Utata na usahihi unafikia kilele chake katika kazi zake za *Nagona na Mzingile* ambazo mpaka sasa bado hunitoa kijasho ninapozisoma. Wataalamu wa ndani na nje ya Afrika Mashariki wameandika makala za kila nui kuhusu kazi za Kezilahabi, mwandishi ambaye naye aliwahi kuandika kwa uketo kuhusu Shaaban bin Robert.

Miongoni mwa waandishi walio bobeza katika uhakiki wa kazi za Kezilahabi ni Prof Kyallo Wadi Wamitila na Dkt Ahmad Kipacha. Kwa kweli kama fasiri ya *Nagona na Mzingile* inakutazita hao ndio watu wa kuwaomba wakusaidie kutanzia utata.

Ulimwengu wa Kiswahili umepigwa pute na johari adimu Prof Kezilahabi



Nilipata fursa ya kukutana naye Kezilahabi mara kadha katika mabara matatu duniani. Niliwahi kukutana naye kwenye mji wa Madison Marekani alipoalikwa kutoa mhadhara katika Chuo Kikuu cha Wisconsin-Madison alikokuwa amepatia shahada yake ya uzamifu awali. Nilipata fursa nzuri ya kutangamana naye, kupiga soga naye na kula naye na kufaidi ucheshi wake wa kupindukia. Ilikuwa furaha iliyoje kutangamana na nguli huyu wa fani ya ubunifu na taaluma ambaye aliegemea sana katika falsafa!

Nilikuwa naye pia Ujerumani kwenye makongomano ya kila mwaka yanayoandaliwa kwenye mji wa Bayreuth ambapo mihadhara yake ya kus-

isimua ilikuwa ikipokelewa kwa hamu na ghamu. Aidha nilikutana naye Afrika, kwenye Chuo Kikuu cha Botswana alikokuwa anafundisha kwa miaka mingi.

Sasa hatunaye tena, kaenda njia ya marahaba. Msiba huu si wa familia yake peke yake bali ni msiba wa jumuiya nzima ya wapenzi wa Kiswahili na fasihi yake. Sisi "Waswahili" tulio kumbana naye vitabuni na maishani tulimfahamu. Ndiyo maana tunamlilia mwenzetu, tunaombeza ingawa baadhi ya watu wanasema tunasherehekea maisha yake. Nje ya mawanda ya Kiswahili hata hivyo, hakujulikana Kezilahabi.

Nasema makiwa kwa msiba huu.